

## Liebi Mitglieder, liebi Leserinne ond Leser vonnere ossergwöhnliche «Appezeller Poscht»

Ossergwöhnlig isch si, wil zom Jubiläum ar<sup>o</sup>ai 500 Jahr bi de Eidgenossenschaft e ganzi Schar vo Mitglieder oss üserem Verein, em Appezellerverein Basel ond Omgebige, de Iiladig, de 1. August zemme mit de Bevölkerig vo Troge, Spicher, Wald, Rechtoebel ond Büeler off de Höche Bueche z fiire, Folg gleischtet het. Ond seb tar i vorweg scho säge, s het niemerd graue, as er der wiit Weg gwoged hed, au wenn im e Gedicht oss em vorletschte Johrhondert stohd:

*"Die Aussicht für die Bühlerer in die Berge sei prekär, wenn da die hohe Buche und die Wissegg nicht wär."*

Bi schönstem Wetter, da chönd alli bezüüge, wo a dem 1. Auguscht of de Bueche n obe gsee sönd, het mer üüs förmlig vetwöhnt. Wa mer do hönd töre n erlebe, sprengt jede Rahme. Ufmarschiert sönd d Lüüt glichzeitig, i Form vomene Sternmarsch, vo allne Siite her. Buebe ond Meetle mit ond ohni Eltere, Fraue, Manne, dronder natürlig au Vetreter vo de lokale Behörde. E Programm ischt bbotte worde, wo nümme z übertröffe n ischt. Turnerinne ond Turner vo Wald a de Schaukelring, vor de schönste Kullisse, direkt vor em Alpstee. Di junge Wilde vo Troge, denn di Vereinigte Musiggsellschafte ond Chör. Em Hannes vo Wald, wohrschinnlig em

grööschte n Appezeller, wo dör s Programm gfuehrt het, ischt ganz e wichtigi Rolle zuecho. Nostalgeschi Spektakel ond au alti Handwerchskunscht het mer chöne bestuune. Bsonderi Attraktione het s för d Goofe ggee. Gruessbootschafte vo de Regierig ond vo de Standeskommissio sönd überbrocht worde. E Red zom 1. Auguscht - ond erscht no innere originelle Art - het e so wenig gfählt, wie de Funke noch em Linachte. Ond dröberuus: En vo beide Kantö allne Bsuecher offerierte Znacht: Süd-wörscht (föer die wo s glanget het) mit Chähörnli ond Epfelmues vo exzellenter Qualität ond au no e Getränk dezue.

Ond, wa ischt jetzt s Ossergwöhnlig a dere Poscht? Om d Vielfalt vo dem Aaloss vo üsere Siite z onderstriche, wartid nüd mönder as vier vo üsere Mitglieder, s Vreni Preisig, de Fredy Aschwanden, de Willi Schläpfer (vo Wald) ond de Edgar Sütterlin - jedi ond jede - mit emene äägne Pricht uuf. Ond wenns denn no Platz het, mach i mi zwüsched ie au no bemerkbar.

Mer sägid tuusig Dank deför, dass mer hönd töre debii see. Da ischt tatsächlich «En gschenkte Tag» gsee. Öppe n e so, wie s im Jodellied vom Adolf Stähli häässt!

Jakob Bodemaa